

Lii Leksyooñ: Keekwaay Anima Ohchi?

Aeñ liivr ooma eekishkinohamaakoyen taanshi chii-tootaman ashpi li leksooñ itakwahki. Miina chii-kishkinohamaakoyen keekwaay anihi lii leksooñ, pii taanehki aeñ leksooñ weehchi-itakwahk, awashimee oota ati-oshipehikaateew keekwaay.

Taanehki la Leksooñ Kaa-wee-ashtee? Keekway Anima Oohchi?

Lii leksooñ wiitapanwa por awiyak chii-niikaaniishtamaashk daañ tooñ piyii. Chii-li-vwat-iyyan por awiyak daañ li riding tooñ provaens oota oschi chii-atoshkeeshtamaakoyeek daañ li parlamaañ. Piiko chii-livwat-iyahk awiyak aeñ nom keema en faam, chii-atoshket, tako chii-piikishkwet, chii-piikishkweshtamaakoyahk kiyanaan oschi, daañ l'Ottawa.

Daañ li Kanada, 338 lii riding itakwanwa. Keekwaay anima aeñ Riding? Daañ li leksooñ eepimipahtaat peeyak awiyak oota oschi chii-niikaaniishtamaashk Ottawa. Awinanaka li-vwat-iyyen daañ li provaens oschi ayaaw aeñ sez daañ li Commons.

Pimipahtaawak por lii koñservateur, por lii libiraal, por lii NDP, lii ver, por kotakak lii paarti, oubaeñ kahkiyawiya wiichiheew. Ana mawachi mishakamik lii vwat kee-ayaat li gavnimaañwa oshiyeeew. Ana kaa-niikanit aanda daañ li parti ka-pashkiyaakeechik, eekwana li prime minister ita-ikaashoow.

Gakashkitaan Chiiñ Chii-li-vwat-iyaan?

Kakashkitaan! Kiishin . . .

- Kiishin daañ li kanada ohchiiyani, kita-li-vwat-iin.
- Sa praañ jis-hwit aañ chii-ashpitishiyen chii-li-vwat-iyyen.
- Piiko lii papyii chi-pimohtataayen awina kiya, tooñ nom chii-oshipehikaateek, tooñ nadres, taandee weehchiiyen, eekwa tooñ naazh.

Daañ li Registrii Chiiñ Ndapin?

Piiko daañ li registrii chii-apiyen!

Mashkouch inooñ kakakashkitaan chii-li-vwat-iyen kiishpin kii-shipwepichiyen den vil oschi kotak en vil ee-shpichiyen, eekwa kiishpin keema lot bor la mer ot-ohteyen, keema li pramyii few chii-li-vwat-iyyen, keema aeñ naañfaañ dikol eeka kiikiwahk ee-wiikiyen.

Daañ li computer itaapi, madooñ daañ li registrii chii-apiyen.

elections.ca/register Weehkan, pii li taañ kaka-pimaatitan.

Kiishpin ndaweeyihtamani chii-wiichihikawiyen, kakapeekitoshinaan, ooma li nooñbr
1-800-463-6868

Daañ la maal kaka-ohtitik aeñ kart por chii-li-vwat-iiyen.

Apiyani daañ li registrii, Kaka-ohtitik ana la kaart ashpi en leksyooñ wee-yamakan itweetwaawi.

Kahkiyaw keekwee kaka-li-check-iin daañ tooñ kaart, tooñ noom, tooñ nadres, kahkiyaw keekwee. Kiishpin kahkiyaw keekwee miyopayiki, eekoshi daañ li registrii ee-apiyen.

Kiishpin eeka keekwee miyopayiki kapeekitoshinaan, oubaeñ daañ li computer kaka-itaapin, **elections.ca**

Daañ la kaart ta-oshipeehikaatew taandee chii-li-vwat-iiyen, taandee lii poul, miina ta-ayaaw aanda awiyak daañ li poul ee-itweshtamaaket, eekwa awashime keekwee nohte-kshkehtamani kaakwechimik aniki daañ la poul.

Taanshi Kaa-ishi-li-vwat-iyaañ?

Piiko-ishi kaka-li-vwat-iin, maaka teepiyahk en fwe chii-li-vwat-iiyen.

- Piiko-ana ta-li-vwat-iiw li zhour di leksyooñ
- Ki-ta-li-vwatiin piiko-ashpi teepiyahk pashkinikateeki lii poul avaañ li leksyooñ.
- Ki-ta-li-vwat-iin daañ lii zofis Elections Canada
- Ki-ta-li-vwat-iin keema daañ la maal ki-ta-shipwetishayen tooñ vot

Li Zhour di Leksyooñ

12 zeur pashkinikateewa lii poul.

Chii-ohchi-kishkeeyihtaman taandee eekwa taanshpi chii-li-vwat-iichik,

- Daañ ta kart chii-itaapiyen taandee ee-li-vwat-iik.
- Miina daañ tooñ computer waapahta taandee chii-itohteyen, **elections.ca**, chii-oshipehaman tooñ postal code neetee.
- Oubaeñ pee-kitoshinaan **1-800-463-6868**

Pashkinikateeki lii Poul avaañ li Leksyooñ

ayishi nikateewa anihii lii zhour, advanced polls

VANDARJI – SAMJI – JIMAAÑSH – LUNJI

Pashkinikateewa lii poul avaañ apre miji ikohk li hwit teur li swer, lii kat zhornii.

Chii-ohchi-kishkeeyihtaman taandee eekwa taanshpi pashkinikateewa lii poul avaañ li leksyooñ:

- Daañ ta kart chii-itaapiyen taandee ee-li-vwat-iik.
- Miina daañ tooñ computer waapahta taandee chii-itohteyen, **elections.ca**, chii-oshipehaman tooñ postal code neetee.
- Oubaeñ pee-kitoshinaan **1-800-463-6868**

Ki-ta-li-vwat-iin daañ lii zofis Elections Canada

Ashpi kaa-itweechik lii leksyoon ee-wii-itakwaki, ohchi ndoohata taanshi lii Advanced Polls pashkinikateeke.

Ashpi kaa-itweechik lii leksyoon ee-wii-itakwaki, kita-itoohataan lii zofis Elections Canada li morji avaañ chipwa la leksyoon hwit eur li mataeñ ikohk siz zeur, supii.

Chii-mishkaman lii zofis Elections Canada, daañ tooñ computer waapahta, **elections.ca**, oubaeñ mina pee-kitoshinaan daañ li telephone **1-800-463-6868**. Noo keekwee lii zofis Elections Canada daañ lii pchit vil, yaeñk daañ lii gros vil.

Ki-ta-li-vwat-iin keema daañ la maal ki-ta-shipwetishayen tooñ vot

Eeka kiikiwahk ayayani, ashpi lii leksyoon ashtekwawi, daañ la maal ki-ta-shipwetishayen tooñ vot.

Oomshi ki-toohten:

- Daañ la maal itohteyen, piiko-anima li govarnemañ sooñ nofis itohtee, kakawiihtamakawin taandee chii-nataman lii form chii-li-vwat-iik por li leksyoon.
- Piiko chi-ayaayaahk tooñ form **avaañ ooma** li morji avaañ la laksyoon.
- Tooñ form ka-ayaayaahk, peehta tooñ form niyanaan ohchi por li-vwat-iien daañ la maal.
- **Kaaya peehta ikohk apre la leksyoon!** Kaaya shipwetishaha tooñ vot apre la leksyoon, oshaam wiikach. Kaka-li-vwat-iin ashpi ka-oshipehikateeki aanda ashpi chii-li-vwat-iien.

Keekway lii Papyii Chii-shipwehtataayaan Chii-li-vwat-iiaan?

Ndaweeyihchikateewa lii papyii chii-kshkeeyihtahkik awina kiya, taanshi ee-ashpitishiyen, taandee wee-hchiyen.

Pimohtata kahkiyaaw tii papyii, mashkouch kakakakwechimikwahk. Piiko peeyak aeñ papyii chii-ayaayen. toultaan pimohtata aen papyii avik tooñ portre, tooñ noon, eekwa taandee ee-wiikiyen, sa praañ, sa praañ.

Oubaeñdoñ

Deu lii papyii avik tooñ nom, eekwa aeñ not papyii tooñ nadres mina.

Oubaeñdoñ

Deu lii papyii avik yaeñk tooñ nom, eekwa kakakakwechimikawin taanshi tooñ nom, pii taandee wiikiyen. Miina sapraañ, awiyek kaka-itweshtamak. Ana kaa-itweshtamaashk sapraañ wiishta kahkiyaw sii papyii, awina wiya, chii-waapahtayiwet. Piiko daañ peeyakwan li registrii wiishta chii-apiyahk.

Kiishpin kitayaan tii papyii por la leksyoon yaeñk daañ tooñ email, kikashkitaan chii-waapahtayiyahk tii papyii por la leksyoon daañ tooñ telephone, abaeñdoñ chii-li-print-iien oñhi lii papyii.

Taanshi Kee-ishpayik Li-vwat-iyaani?

En fwe kaa-apiyen daañ li registri, oomshi ta-ishpayin daañ li poul kee-itohteyen chii-li-vwat-iyen

1. Kiishin aeñ vyeu keema en vyeey ka-itohtahikaashow aantee chii-ndoo-li-vwat-iit
2. Kiishpin en zhen, ta-wihtamaakaashow taantee chii-ndoo-li-vwat-iit.
3. avaañ chii-miyishk tooñ papyii por li-vwat-iyen, sa praañ kiya chii-wapahtayak tii papyii.
4. Daañ la taab aanda kaa-miikawiyen Returning Officer kakamiyik tii papyii ka-oshipehikashochik aantee aniki kaa-pimipahtaachik.
5. Apre kaa-li-vwat-iyen, neeyap pee-miyachit tooñ papyii Returning Officer ta-manipitam anima li morsoo di papyii kaa-oshipeyikateek “tab”.
6. Tashiwataaw daañ la bwet tooñ vot, eekwa wiya ka-kanaweyihtam anima “tab”.

Aeñ Naañfaan Dikol Niya, University Nditohtaan, Eekwa Taanshi Chii-Tohtamaan Chii-livwat-iyaan?

Chii-li-vwat-iyen, sa praañ chii-apiyen daañ li registrii. Itapee daañ tooñ computer madooñ daañ li registrii chii-apiyen por chii-li-vwat-iyen por lii leksyooñ. elections.ca/register.

Deu plaas kiishin kitayaan - likol, oubaeñ en ot plas, piiko peeyak chii-kakeekinaman. Saprään chii-li-vwat-iyen por awiyek ee-pimipahtaata den plas kaka-kakeekinaman. La plas kaa-kakeekinaman kakakashkitaan chii-li-vwat-iyen neetee piiko.

Nawat chii-kiiweeyen ashpi li laksyooñ itakwahki chii-livwatiyen.

Apiyani daañ li registrii, Kaka-ohtitik ana la kaart ashpi en leksyooñ wee-yamakan itweetwaawi. Kakawiihtamaakawin taantee eekwa taanshi chii-vwat-iyen.

Kaaya waniihkee: kiishin eeka chii-apiyen kiikiwahk, eekwa lii leksyooñ wiitapanwa, kakakashkitaan chii-livwatiyen daañ la maal oubaeñ den ofis Elections Canada.

Keekwaay Ee-ayaachik daañ lii Poul Chii-wiichihiikoyaan Chii-livwat-iyaan?

Mishakamik dayaanaan ishi chii-wiichihiikawiyen chii-li-vwat-iyen daañ li leksyooñ.

- Kakamiyikawin lii lunet ee-shoohkahki-nawach ashpichi lii lunet. Kakamiyikawin chii-wapahtaman anihii lii nom aniki kaa-pimipahtaachik.
- Eeka waapiyani, kiishin Braille kashkitaayen chii-apachitaayen chii-ayamihtaayen lii noom, tanihi taanda, awina wa-li-vwat-iyen, eekota kakamishkawaaw aanda aniki kaa-pimipahtaachik.
- Wiitamawinaan kiishpin chii-kashkitaayen chii-ayamihtaayen chii-ayitinamaakawiyen avik lii dwe daañ li leksyooñ.

- Kiishpin wii-itohteyani daañ lii poul chii-li-vwat-iyyen daañ li leksyooñ kawiiicheewiitin eekwa kawiiichihitin chii-li-vwat-iyyen, niya keema pahkaan awiyak aañ Michif ee-piikishkwet.
- Dakashkitaanaan, nawach chii-washee-ayaak chii-nayaapahtaman tooñ vot.
- Kiishpin nohtee-li-vwat-iyyani daañ ta maezooñ, peekitoshinaan. Sa praañ chii-mashkishiyen.

Kaa-ishi-wiichihikoyeek Chii-li-vwat-iyeeek

Apiyani daañ li registrii, Kaka-ohtitik ana lav kaart ashpi en leksyooñ wee-yamakan itweetwaawi. La kart, ana kaa-kii-ohtitishk daañ la maal, ka-oshipehikaatew taandee chii-li-vwat-iyyen. Miina daañ tooñ computer waapahta taandee chii-itohteyen, **elections.ca**, chii-oshipehaman tooñ Postal Code neetee.

Tahkoshiniyani daañ la poul ta-ayaaw aanda awiyak chii-pashkinamashk la port. kaka-wiihtamawaaw ana kaa-pashkinamashk la port taanshi chii-wiichihishk. Waapahtayeew ana li sheriff ee-apiyet li poul klerk eekwana ka-wiichihik.

Nditohtaanaan daañ lii poul aanda chii-ndoo-kehchinawiyaahk kahkiyawiyak ee-kii-li-vwat-iit, eekwa kahkiyawiyak kwayeshk chii-wiichiyichik chii-li-vwat-iichik.

Kiishin keekwaay kitayaan chii-wiihtamawiyaahk por lii poul oschi, wiihtamawinaan, niyanaan ga-ohchi-kanawaapahtenaan kahkiyaw-keekwee chii-miyo-payik.

Ta-kakeekinamwak Elections Canada taandee chii-ashtek lii poul. Peekitoshinaan taanshi ee-ishi-kakeekinahkik Elections Canada taandee chii-livwat-iichik.

Taanshi Kaa-ishi-wiihtamaawakik Elections Canada Taanshi Ee-tootahkik?

Wiihtamawinaan taanshi ee-tootamaahk. Wiichihinaan chii-wiichihikawiyen. Kakashkitaan:

- Aeñ form kakamoshkinataan **elections.ca**
- Keema peekitoshinaan **1-800-463-6868**
- Apachihta TTY chii-peekitoshiyaahk, **1-800-361-8935**
- Keema awiyek kitakitotaaw daañ li poul.

Chii-wiihtamawiyaahk taanshi ee-tootamaahk chii-wiichihayaahk li mood, kakashkitaan:

- Kotak eñ form kakamoshkinataan por taanshi ee-wiichihikawiyen **elections.ca**
- Keema awiyek kitakitotaaw daañ li poul.

Taandee Chii-itohteyaan Mitoni Chii-kishkinohamaakoyaan?

- Chii-kiyokeyen **elections.ca**
- Peekitoshinaan **1-800-463-6868**
- Apachihta TTY chii-peekitoshiyaahk, **1-800-361-8935**

Kahkiyaw keekwee nohtee-kishkehtamani por li leksyooñ, mishakamik keekwee kakaishitshamahakawin, tashkouch:

- Lii zhaañdikol chii-kshkeeyihtahkik keekwee por li leksyooñ
- Lii metres dikol eekwa lii medikol chii-ishitshahamaachik lii kit kahkiyaaw pahpeeyak lii leksyooñ chii-metaweechik, chii-kshkeeyihtahkik lii zaañfaañ taanshi ee-atoshkeemakahk lii leksyooñ.
- Keekwaay chii-kshkeeyihtamowiyaawak li mood aeñ leksyooñ ee-wii-itakwahk.

Kakamishken ekwanihi daañ **elections.ca**

Parii Chiiñ Ddayaan Chii-li-vwat-iyaan?

- Sa praañ daañ li registrii chii-kehchinawiyaan eepiyaan, **elections.ca**
- Elections Canada kakaishitshahamak en kart
- Chii-waapahtamaan mii papyii kwayeshki-ashteeki, mooñ noom, mooñ nadres, mooñ nooñbr, pii mooñ portre
- Eekwa awiniki pimipahtaachik? Itohtee **elections.ca** chii-oschi-kshkeeyihtaman awina
- Chii-kishkeeyihtamaan taanishi keema taandee chii-li-vwat-iyaan
- Daañ mooñ kalaandelyi ga-oshipeehen taanshpi la leksyooñ wa-itakwahk
- Chii-kshkeeyihtamaan taanshi chii-itohteyaana chii-li-vwat-iyaan